

## শিক্ষা

### শিক্ষা প্রতিষ্ঠানের দেয়ালে লিখন প্রসঙ্গে

শিক্ষা প্রতিষ্ঠানবিহীন কোন দেশ বা জাতি এ বিশ্ব চরাচরে নেই। পৃথিবীর অন্যান্য দেশের ন্যায় আমাদের দেশেও শিক্ষা প্রতিষ্ঠান আছে। তা পৃথিবীতে হতে পারে আবার কারিগরী কিংবা 'হাতে কলমে' শেখার প্রতিষ্ঠানও হতে পারে। আদতে এ জগত সংসারটাই একটি শিক্ষা প্রতিষ্ঠান। কিন্তু সমগ্র পার্থিব শিক্ষা প্রতিষ্ঠানকে নিয়ে আজকের আলোচনা নয়। আমি আজ বিশ্লেষণ করবো আমাদের দেশের পৃথিবীতে ও কারিগরী শিক্ষা প্রতিষ্ঠানকে নিয়ে। অর্থাৎ বিদ্যালয়, মহাবিদ্যালয় ও বিশ্ব বিদ্যালয়গুলো নিয়ে।

মানুষ সুন্দরের পূজারী, সৌন্দর্যবোধ মানুষের বুদ্ধি বৃদ্ধির অন্যতম উপাদান। সৌন্দর্যবোধহীন মানুষ পৃথিবীর অন্যান্য দেশে বিরল হলেও

আমাদের দেশের শিক্ষা প্রতিষ্ঠানগুলোতে এদের দল বেশ ভারী। এর উৎকৃষ্ট প্রমাণ আমাদের দেশের প্রায়-সকল শিক্ষা প্রতিষ্ঠানের দেয়ালের লিখন।

এক জরিপে (ব্যক্তিগত) দেখা গেছে, দেশের শতকরা ৯৭.৮ ভাগ শিক্ষা প্রতিষ্ঠানের দেয়াল বিভিন্ন লেখায় পরিপূর্ণ। লেখাগুলোর সিংহভাগই হচ্ছে বিভিন্ন রাজনৈতিক দল, তাদের অঙ্গ সংগঠন হিসেবে ছাত্র সংগঠন এবং নেতা-নেত্রীদের শ্লোগান সম্বলিত। রাজধানী ঢাকাসহ দেশের এমন কোন জেলা নেই যেখানে দেয়ালে লিখনবিহীন শিক্ষা প্রতিষ্ঠান আছে। দেয়ালে শ্লোগান লেখা, নেতা-নেত্রী ছবিসহ লিখিত জয়ধ্বনি করা কিংবা ভোট চাওয়া থেকে মফস্বলের স্কুল-কলেজগুলোও বাদ নেই।

শিক্ষা প্রতিষ্ঠান হচ্ছে যে কোন দেশের পবিত্রতম স্থান। মসজিদ, মন্দির, গীর্জা, প্যাগোডা যেমন বিভিন্ন

ধর্মাবলম্বীর কাছে পবিত্রতম স্থান, স্কুল-কলেজ, বিশ্ববিদ্যালয়গুলোও তদ্রূপ। বেশীর ভাগ সময়ে এ সকল শিক্ষা প্রতিষ্ঠান থেকে ছাত্র-ছাত্রীরা শিক্ষা লাভ করে জীবন সময়ে সঠিকভাবে, তরী চালানোর দিক নির্দেশনা পেয়ে থাকে। অথচ ইদানীংকালে 'শিক্ষার' নামে প্রহসন শুরু হয়েছে শিক্ষা প্রতিষ্ঠানগুলোতে। আমাদের দেশের রাজনৈতিক দলগুলো তাদের স্বার্থ হাসিলের জন্য ছাত্র সংগঠনগুলোকে দিয়ে শিক্ষা প্রতিষ্ঠানগুলোর দেয়ালে 'চিকা' মেরে শিক্ষাঙ্গনকে করছে কলংকিত। এতে করে লংঘিত হচ্ছে শিক্ষা প্রতিষ্ঠানের পবিত্রতা।

ইদানীংকালে প্রাথমিক বিদ্যালয়গুলোও রেহাই পাচ্ছে না এই বিকৃত রুচিসম্পন্ন রাজনীতিকদের হাত থেকে। অধুনা মাদ্রাসাগুলোও এদের করাল থাবায় পতিত হচ্ছে। যা একটি স্বাধীন দেশের সচেতন নাগরিক হিসেবে আমাদের জন্য লজ্জাজনক।

ছাত্র রাজনীতি তথা রাজনীতি দোষের কিছু নয়। তাই বলে শিক্ষাঙ্গনের দেয়ালকে রাজনীতির 'শ্লোগান স্ট্যাণ্ড' হিসেবে ব্যবহার করা উচিত নয়। অতীতেও রাজনীতি ছিল, ছিল রাজনৈতিক এবং রাজনৈতিক দলও। শুধুমাত্র অভাব ছিল বর্তমান প্রশাসনের কর্তা ব্যক্তিসহ বিভিন্ন রাজনৈতিক দলের নেতা-নেত্রীদের মতো ব্যক্তি ও তাদের মানসিকতার। কাজেই, সুন্দরের পূজারী হয়ে দেশের শিক্ষা প্রতিষ্ঠানগুলোতে সত্যিকারের সুষ্ঠু পারিপার্শ্বিক পরিবেশ ফিরিয়ে আনার জন্য সকল ছাত্র সংগঠন, রাজনৈতিক দল ও নেতা-নেত্রী, সরকার, সর্বোপরি আপামর জনসাধারণকে এগিয়ে আসার আহ্বান জানাচ্ছি। যে ব্যক্তি সুন্দরের মূল্যায়ন করতে জানে না, সে মানুষ নয়— অন্য কিছু। সৌন্দর্যবোধহীন কোন জাতিই উন্নতি লাভ করতে পারেনি, পারবেও না।

—মোঃ নজরুল কবীর, রীপন